

Glindesdi, ils 29 da zercladur 2020

# LA QUOTIDIANA

FMR Fundaziun Medias Rumantschas, Via da Masans 2, 7000 Cuir, 081 544 89 10, redacziun@fmr.ch

## «Termagls sco pli baul»



(fmr/sr) Questa stad envida il Museum Laax ad in'exposiziun speciala sut il motto «oz far termagls sco pli baul». A caschun dalla vernissascha da sonda vargada han ils schumellins e lur sora giu plascher da scuvierer ed empruar ils termagls dils antentats. *Pagina 3*

# Vaccas lenn ed autos da pleh

«Oz far termagls sco pli baul» – nov'exposiziun el Museum Laax

DA SUSI ROTHMUND/FMR

■ **Questa stad envida il Museum Laax ad in'exposiziun speciala che stat sut il motto «oz far termagls sco pli baul».**

**La sonda ha la menadra dil museum, Romana Brunold, envidau alla vernissascha dall'exposiziun.** «Sut las circumstanzias actualas san ins nuota propi cons che vegnan», ha *Romana Brunold* manegiau cuort avon la vernissascha. Plaunet ein ils hosps denton arri vai. Tenor Brunold perfin daplirs che spitgau. Ei ha numnadamein propi la valeta da prender in'ureta temps per far ina viseta el Museum Laax. El rom dall'exposiziun da termagls da pli baul san affons e carschi smarvigliar, sedivertir ed era far termagls cun autos, ter-

magls da lenn, stivas da poppas e bia auter. Vesend il vial da ruclas ston era dunnas ed umens carschi schar rullar ina ni l'autra – per sesentir per in mument sco in affon.

## Termagls antics

Perfin per museums pigns sco quel da Laax ei la malsegirtad stada gronda ils davos meins. L'exposiziun hospitonta ed il program da stad ein perquei vegni spustai sin l'auter onn. Tuttina ha Brunold buca vuliu desister da porscher enzatgei interessant als visitaders ed ha fatg cuortas, realisaond in'exposiziun ch'ella haveva daditg previu en patratgs. Il «lockdown» ha la menadra dil museum nezegiau per slargar e cumpletar il sortiment da termagls antics ch'eran gia avon



maun egl inventari dil museum. Bia ha Brunold survegniu da vischins e parents ed enqual toc ha ella cumprau vitier. In'idea co l'affonza a Laax veseva ora all'entschatta dil 20avel tschentaner survegnan ils visitaders grazia allas fotografias originalas da quei temps che pendan vid las preits dil museum.

<https://www.prolaax.ch/dt/ortsmuseum.php> //  
Uras d'avertura: mardis e gievgia dallas  
15.00–18.00.

Tier l'exposiziun da termagls antics s'auda era la pratica da miedi en miniatura.

FOTO SUSI ROTHMUND